



## Skýrsla formanns Skógræktarfélags Selfoss fyrir árið 2006, lesin á aðalfundi félagsins þann 10. apríl 2007.

Starf Skógræktarfélags Selfoss á 54. starfsári var með nokkuð hefðbundnu sniði. Starfsvettvangurinn var sem fyrr Hellisskógur. Vöxtur og viðgangur trjáa er með ágætum, þó fengu sum af skjólbeltum í Hellismýrinni á sig svo mikinn maðk að stór sá á beltunum allt sumarið vegna laufleysis. Hlýinda kafli í febrúar varð til þess að frostþol nokkra tegunda minkaði þannig að kal var vart í þeim tegundum sem eru hvað fljótastar til á vorin.

Sendir voru út greiðsluseðlar til félagsmanna vegna félagsgjalds fyrir árið 2006. 120 greiddu félagsgjöldin. Samkvæmt félagaskrá eru nú 142 skráðir meðlimir í félaginu.

Í maí byrjun fékk félagið afhent Umhverfisverðlaun Árborgar, fyrir *ötult starf að skógrækt og uppbyggingu útivistarsvæðis í Helliskógi*.

Á vormánuðum kom í ljós að það svæði sem plantað var í sumarið 2005 var ansi blautt. Var gripið til þess ráðs að plægja með svokölluðum lokræsaplóg þau svæði sem ætluð eru til trjáræktar enn voru en of blaut.

Eitt af markmiðum félagsins er að efla áhuga almennings á gróðursetningu, trjám, umhirðu og útivist í skóglendi félagsins. Eins að almenningur fái að upplifa og njóta skógar í sínu næsta umhverfi. Þetta hefur m.a. verið gert í gegnum grunnskólana í bænum ásamt vinnuskóla sveitarfélagsins. Á undanförunum vorum hafa t.d börn úr Vallaskóla gróðursett árlega 500 tré á vissu svæði vestarlega í Hellisskógi.

Mikil umferð gangandi fólks er um skóginn. Aukin umferð fólks með hunda í Hellisskógi er visst áhyggjuefni, þar sem margir hundaeigendur sjá ekki sóma sinn í að hirða upp skítinn eftir hunda sína. Þetta veldur oft göngufólki ómældri óánægju, enda fátt leiðinlegra en að stíga í hundaskít. Annað sem veldur áhyggjum er lausaganga hunda á varptímanum. Koma þarf á ákveðnari og skýrari reglum um umgegni á svæðinu og hvetja bæjaryfirvöld til að opna nýtt svæði fyrir hundaeigendur til að viðra hunda sína á.

Eins og undangenginn ár voru haldinn tvö vinnukvöld á vegum félagsins. Fyrri kvöldið var mánudaginn 12. júní og það síðara miðvikudaginn 14. júní. Gróðursett var á svæðum neðan skurðar, austan Hellisbrúar neðan við Biskupstungnabraut. Byrjað var á að bæta inní fyrir þær plöntur er drepist höfðu um veturinn, og síðan í land sem ekki hafði áður verið gróðursett í. Samtals var plantað um 1700 plöntur af birki, greni og ösp þessi tvö kvöld. Landið hafði verið jarðunnið með svokölluðum Hrosshagaplóg fyrir tveimur árum. Einnig voru gróðursettar 4300 plöntur af reynivið, birki, greni, ösp og furu af verk-tökum á þessu sama svæði síðar um sumarið. Samtals voru því gróðursettar 6500 plöntur þetta árið í Hellisskógi. Að gróðursetningu lokinni var borið blákorn á allar nýgróðursettar plöntur.

Hafin er vinna við gerð aðgerðaráætlunar fyrir Hellisskóg, þar sem metin verður aðgerðarþörf á næstu árum í þeim reitum sem búið er að planta í á svæðinu. Áætlunin gefur betri heildarmynd á stöðu ræktunar á svæðinu.

Settir hafa verið upp bekkir og borð á þremur stöðum þar sem menn geta hvílt lúin bein. Einn bekkurinn var settur við bílaplanið hjá trjásafninu, annar við Ölfusá aðeins ofar með ánni, og sá þriðji uppá hól skammt norðan við Grímskletta þar sem útsýni er mjög gott. Með bekkjunum er aðstaða þeirra sem vilja setjast niður með nestið sitt út í náttúrunni stór bætt.

Hafin er vinna við gerð endurskoðaðs umsjónasamnings félagsins við sveitarfélagið Árborg. Ætlunin er að með samningnum verði tryggð öruggari aðkoma félagsins að því

svæði sem félagið hefur haft umsjón með í Hellisskógi. Samningurinn þarf að tryggja áframhaldandi uppbyggingu á Hellisskógi sem útivistar- og skógræktarlands fyrir almenn-  
ing um komandi framtíð þar sem aðgengi verði bætt til muna.

Sem fyrr var skipulögð almenn gönguferð á vegum félagsins í tengslum við "Vor í Árborg" og er það liður í að auka áhuga almennings á félaginu og Hellisskógi. Ferðin var nokkuð vel sótt þetta árið, um 25 manns gengu uppí Hellisskóg í blíðskapar veðri. Ferðir þessar eru ávalt fróðlegar. Þetta árið var það Hermann Ólafsson sem fór fyrir göngunni.

Starfsmenn þjónustumiðstöðvar hefluðu og lagfærðu akvegin upp að hellinum fyrripart sumars. Bera þurfti mól í nokkra kafla af veginum, einnig var breikkuð frekar þröng beygja þar sem vegurinn fer yfir skurðinn neðan við Grímskletta. Á þessum stað voru stærri rútur oft að lenda í vandræðum.

Það sýnir vel hve umferðin er mikil á akveginum upp að hellinum að 1 - 2 mánuðum eftir heflun er vegurinn orðin jafn holóttur og fyrr.

Mikið flóð var í Ölfusá seinnipartin í desember. Vegna vatnavaxtanna þurfti að loka veginum upp í Hellisskóg. Minniháttar skemmdir urðu á veginum sem sveitarfélagið lagaði leið og flóðið rénaði.

Eftir áramótin hófst grisjun á nokkrum af skjólbeltunum í Hellisskógi. Mörg beltin eru orðin mjög ber að neðan og farinn að hleypa miklum vindi í gegnum sig, sérstaklega þau beltin sem eru einstofna. Ákveðið var að saga þau niður, enda brautryðjendahlutverki þeirra margra lokið. Einnig voru skjólbeltin sem voru farin að vaxa út yfir vegi, göngustíga og yfir framtíðar tré snyrt þannig að þau væru ekki til vandræða. Grisjað var í og við trjásafnið enda trén farin að stækka talsvert og þurfa aukið rími.

Í mars mánuði náðist samkomulag við Vegagerðina um að hún kosti og leggi veg frá Biskupstungnabraut yfir skurð og að girðingu nærri Hellisbrúnni. Það verður svo félagsins að sjá um sjálft bílplanið fyrir innan girðinguna. Þetta bætir aðgengið frá Biskupstungnabraut til muna.

Í lok mars var farið á fund Bæjarstjóra og óskað eftir að samstarfssamningurinn yrði endurskoðaður. Tekið var vel í erindi félagsins og bent á að senda formlega beiðni til bæjarráðs þess efnis, sem hefur verið gert.

Á komandi árum verða vegagerð, stígagerð, uppbygging á aðstöðu og umhirða skógarins þau verkefni sem verða hvað mest aðkallandi.

Núverandi stjórn þakkar félögum, styrktaraðilum og öðrum hlutaðeigandi samstarfið á liðnu ári, og sýnir hug sinn til félagsins með því að bjóða öll fram krafta sína til stjórnunarverka á komandi skógræktarári.

Fyrir hönd stjórnar Skógræktarfélags Selfoss,  
Björgvin Örn Eggertsson, formaður

*Aðrir í stjórn eru: Snorri Sigurfinnsson ritari, Örn Óskarsson gjaldkeri, Hermann Ólafsson og Ólafur H. Guðmundsson varamenn.*